

Ledikasyon enn Gran Zafer

Anprann,
Depi so pli tipti zafer
Anprann li.
Inform u.
Rod u ledikasyon.
Zame li tro tar, zame
Pu kikenn ki so ler inn vini pu li anprann.

Anprann ABC, li pa ase, me
Anprann li. Pa ezite, Kamarad,
Degaz u. U bizin konn tu.
Ansam ek u bann matlo,
U ki bizin pran ladireksyon.

U Brown Sequard, anprann.
U Prizon Bo Basin, anprann.
U fer luvraz lakaz, anprann.
U pansyoner, anprann.
U zonn frans
U karo kann
U Devlopman, MOW, anprann.
U vann gato, anprann.

Marsan butey
Servant lopital
Peser kazye
Rosbann, anprann.
Vasye
Debarder
Marsan guyav de sinn, anprann.
Anfle kamyon
Gardyen sase
Prostitye
Sarite
Sarbonye
Somer, anprann.
U travayer, anprann.
Ansam ek u bann matlo
U ki bizin pran ladireksyon.

Seki pena lakaz, rod lekol,
Seki fre aswar dan liver, rod konesans,
Seki pena enn buse manze, akapar enn liv.
Zarm sa.

Ansam ek u bann matlo
U ki bizin pran ladireskyon.

Pa bizin onte, dimande, Kamarad.
Pa les personn dekuraz u.
U bizin konn tu.
U bizin get dan liv avek u prop lizye,
U ki bizin zize.
Seki u pa kone par u
U pa konn ditu.
Chek u kont rasyon u-mem,

U ki bizin pey li.
Poz u lame lor sak lartik
Dimande,
'Abe kimanyer sa finn vinn la?'

Ansam ek u bann matlo,
U ki bizin pran ladireksyon.

par Berthold Brecht (adapte depi Alman ek versyon Angle par Lindsey Collen, c. 1984.)